



PROJEKT PRAVOSUĐE PROTIV KORUPCIJE  
U BOSNI I HERCEGOVINI



Udruženje portparola tužilaštava u Bosni i Hercegovini  
Удружење портпарола тужилаштва у БиХ  
Udruga glasnogovornika tužiteljstava u Bosni i Hercegovini



# Etika, Integritet i Transparentnost u Pravosuđu

Bilten br. 2.

Udruženje glasnogovornika u tužilaštvima u BiH

Valtera Perića 15  
71000 Sarajevo

Tel: 033 442 614



# PRED – GOVOR

Pravosuđe u Bosni i Hercegovini djeluje u izuzetno kompleksnom okruženju i ne može egzistirati izolirano od javnosti. Građani moraju imati priliku da budu upoznati sa odlukama od interesa za javnost, koje se donose u pravosudnim institucijama. Radi se o sektoru koji je kontinuirano izložen velikom interesu šire javnosti. Rad pravosudnih institucija je izložen „pogledima“ građana, medija, međunarodnih organizacija, nevladinog sektora, poslovne zajednice, izvršne i zakonodavne vlasti na svim nivoima u BiH, akademske zajednice i brojnih drugih zainteresiranih javnosti. Često ovi društveni akteri ističu u javnosti netransparentnost u pravosudnim institucijama.

Kako bi se negativna percepcija mijenjala, potrebno je poduzimati mnogo više u svim pravosudnim institucijama. Uz nastojanje da se kontinuirano poboljšavaju učinkovitost, kvalitet i profesionalizam u radu, transparentnost i povjerenje javnosti su prioriteti koji moraju biti u istoj ravni.

Već nekoliko godina Misija USAID-a u Bosni i Hercegovini (BiH) kroz brojne projekte i aktivnosti promovira principe etike, odgovornosti i integriteta u obavljanju javnih funkcija, posebno u oblasti pravosuđa, pružanjem podrške Visokom sudskom i tužilačkom vijeću (VSTV) BiH u razvijanju

instrumenta za njihovu primjenu. VSTV BiH je uz podršku USAID-ovih projekata izradilo nekoliko veoma bitnih dokumenata koji se primjenjuju u praksi sudova i tužilaštava, kao što su planovi integriteta, te kodeksi sudijske i tužilačke etike i prateći dokumenti veoma bitni za njihovu primjenu, kao npr. Priručnik za primjenu kodeksa sudijske etike i kodeksa tužilačke etike, Smjernice za sprečavanje sukoba interesa u pravosuđu, itd. Također, aktuelni USAID-ov projekt Pravosuđe protiv korupcije u BiH (Projekt) posebno podržava partnerske sudove i tužilaštva u jačanju kapaciteta za efikasan rad na predmetima korupcije i organizovanog kriminala visokog nivoa, kao i u jačanju integriteta i transparentnosti u pravosuđu.

Podrška Projekta ogleda se i kroz izradu biltena Udruženja glasnogovornika tužilaštava u BiH „Etika, integritet i transparentnost u pravosuđu“, putem kojeg se nastoje promovirati principi etike, integriteta i značaja transparentnosti, a njegov primarni cilj je upoznati javnost sa osnovnim konceptima etike i integriteta u pravosuđu, ali i postojećim alatima i mehanizmima za njihovo provođenje.

U fokusu drugog izdanja biltena „Etika, integritet i transparentnost u pravosuđu“ je predstavljanje etičkih principa u obavljanju tužilačkog posla, posebno u radu na predmetima organizovanog kriminala i korupcije. Događaji koje smo zabilježili govore nam o važnosti integriteta i pridržavanja principa etičkog kodeksa za nosioce pravosudne funkcije, posebno u javnom prostoru, značaju kontinuirane obuke u oblasti odnosa sa javnošću, te važnosti primjene Komunikacijske strategije VSTV BiH, kao „kišobran“ strategije za sve pravosudne institucije u BiH.

Ovaj bilten izradilo je Udruženje glasnogovornika u tužilaštvima BiH, uz podršku USAID-ovog projekta Pravosuđe protiv korupcije u BiH. Udruženje okuplja glasnogovornike/slужbenike za odnose s javnošću svih tužilaštava u BiH, a od nedavno su se ovom udruženju počeli priključivati i predstavnici sudova. Osnovni ciljevi Udruženja su jačanje transparentnosti pravosuđa i povjerenja javnosti kroz kontinuirano usavršavanje članova, te unapređenje praksi i jačanja standarda u oblasti odnosa s javnošću. Uspostavljanje ovog udruženja pomogao je prethodni USAID-ov Projekt pravosuđa u BiH 2016. godine.

# INTERVJUI



Dragica Tojagić, rođena 02.01.1977. godine. Srednju Ekonomsku školu i Pravni fakultet završila je u Banjaluci. U institucijama pravosuđa zaposlena je od 01.04.2008. godine. U Specijalnom tužilaštvu Republike Srpske radila je na poslovima stručnog saradnika za administrativno – personalne poslove i odnose s javnošću, a od 01.07.2019. godine radi na poziciji sekretara Republičkog javnog tužilaštva RS. Prije rada u pravosuđu, radila je 11 godina u više medija u Bosni i Hercegovini na poslovima novinar-voditelj u Informativnom programu. Pored toga što je sekretar i koordinatorica plan integriteta Dragica Tojagić obavlja i poslove odnosa s javnošću u Republičkom javnom tužilaštvu RS.

## **DRAGICA TOJAGIĆ, SEKRETAR REPUBLIČKOG JAVNOG TUŽILAŠTVA REPUBLIKE SRPSKE**

### **Značaj Plana integriteta u Republičkom javnom tužilaštvu Republike Srpske**

**Planovi integriteta su interni antikorupcioni dokumenti koje zasebno usvaja svaka pravosudna institucija u BiH i sadrže skup mjera pravne i praktične prirode kojim se sprečavaju i otklanjaju mogućnosti za različite nepravilnosti u radu, kao i koruptivnog ponašanja. Vi ste veoma posvećeni u izradi plana integriteta za Vašu instituciju i ujedno ste koordinator za njegovu izradu. Koliko su planovi integriteta važni za tužilaštva? Kakav je njihov značaj?**

**D. Tojagić:** Ako uzmemo u obzir činjenicu da je osnovna svrha donošenja Plana integriteta unapređenje integriteta same institucije, podizanje kapaciteta odbrane institucije od mogućih koruptivnih i drugih neetičkih uticaja na obavljanje osnovne uloge tužilaštva, a to je gonjenje i procesuiranje učinilaca krivičnih djela, Plan integriteta je dokument od izuzetnog značaja za tužilaštvo. Za donošenje jednog ovakvog dokumenta od ključne je važnosti bilo prepoznati koje su to stvarne opasnosti koje mogu dovesti do koruptivnog i svakog drugog neželjenog ponašanja, kao takve ih propisati Planom integriteta i utvrditi adekvatne mehanizme zaštite, što se nadam da je Radna grupa za izradu Plana integriteta, čiji sam i ja bila član uspjela uraditi.

**Koja je vizija i opredijeljenost Republičkog javnog tužilaštva Republike Srpske (RS) kada je u pitanju institucionalni integritet?**

**D. Tojagić:** Obaveza svih zaposlenih, a posebno nosilaca pravosudne funkcije je raditi na jačanju integriteta pravosuđa. Od integriteta nosilaca pravosudne funkcije zavisi i integritet pravosudne institucije, jer javnost najčešće stavlja znak jednakosti između nosilaca pravosudne funkcije i institucije pravosuđa. Plan integriteta Republičkog javnog tužilaštva RS koncipiran je na način da je predvidio provođenje mjera koje bi trebalo da doprinesu boljem funkcionisanju upravljanja institucijom, upravljanju predmetima, bržem i kvalitetnijem vođenju krivičnog postupka, zatim provođenje mjera iz oblasti etike i generalno integriteta.

**Da li su planovi integriteta dali određene rezultate?**

**D. Tojagić:** Na osnovu dosadašnje primjene, određeni rezultati su već postignuti i isti se ogledaju u boljoj saradnji nosilaca pravosudnih funkcija i ovlašćenih službenih lica, boljoj saradnji nosilaca pravosudnih funkcija i zaposlenih, boljem funkcionisanju institucije u smislu donošenja određenih akata, poduzimanju mjera i utvrđivanju mehanizama koji su doprinijeli kvalitetu donošenja tužilačkih odluka, brzini rješavanja pojedinih predmeta, edukaciji nosilaca tužilačke funkcije i ostalih zaposlenih na polju etike i uopšte integriteta.

**Kako biste ocijenili transparentnost tužilaštava u BiH i koliko je ona bitna za izgradnju integriteta jedne pravosudne institucije?**

**D. Tojagić:** U posljednjih nekoliko godina mnogo se uradilo na poboljšanju transparentnosti tužilaštava u BiH, ali još uvijek težimo da postignemo balans u saopštavanju informacija između tužilaštava i medija. Taj balans nije lako postići, jer koliko god postoji pravo javnosti da „zna“ toliko je i pravo i obaveza tužilaštva da informisanjem javnosti ne ugrozi postupak, da poštuje pretpostavku nevinosti, zaštiti privatnost, zaštiti svjedoka, kao i interese učesnika u postupku. Međutim, primjetno je da pojedini mediji teže senzacionalizmu, umjesto da na primjeren način ukazuju na pojedine društveno neprihvatljive oblike ponašanja. Jako malo pažnje se posvećuje pozitivnim događajima i primjerima. Iako je napravljen veliki pomak u tužilaštvima, smatram da i dalje treba razvijati internu komunikaciju, a tu je ključna uloga glavnih tužilaca. Oni su ti koji trebaju jačati internu komunikaciju i raditi na tome da ona korištenjem raznih alata bude planirana, nadzirana i procijenjena u odnosu na ostvarenje cilja koji se želi postići, a to je povjerenje građana u rad Tužilaštva, doprinos kvalitetnijem radu i bolje razumijevanje rezultata rada Tužilaštva.

## Komunikacijska strategija VSTV BiH kao „kišobran“ strategija za sve pravosudne institucije

### Šta definiše nova Komunikacijska strategija VSTV BiH?

Komunikacijska strategija VSTV BiH sažima suštinu strateških pravaca za sektor pravosuđa, a to su obaveza i odgovornost svih institucija unutar sistema u jačanju nezavisnog, nepristrasnog, profesionalnog, i vrlo važno, transparentnog pravosuđa kao neophodnog uslova za jačanje povjerenja javnosti.

Strategija daje i ključne naznake o porukama koje se trebaju plasirati iz pravosuđa prema javnosti, detaljno definiše interne i eksterne javnosti sa kojima je neophodna stalna i integrisana komunikacija, te predviđa set aktivnosti koje su precizno definisane u akcionom planu u prvom aneksu Strategije.

Strategijom se ističe važnost dobro uspostavljene i izbalansirane interne komunikacije u institucijama, kao važnog preduslova za kvalitetnu komunikaciju sa svim eksternim javnostima.

Važan dio strateškog planiranja za pravosudne institucije je i drugi aneks Komunikacijske strategije VSTV-a BiH, definisan kao „Model strategije za krizno komuniciranje za sudove i tužilaštva“, koji utvrđuje četiri strateška pravca i načine planiranja i postupanja pravosudnih institucija tokom kriznih situacija. Da bi se odgovorno

postupalo u krizama svakako je značajno strateško jačanje proaktivne komunikacije, uspostavljanje mehanizama za prepoznavanje rizika i sprečavanja potencijalnih kriza, adekvatno planiranje i upravljanje kriznim situacijama i efikasna provedba kriznog komuniciranja.

Treći aneks komunikacijske strategije jeste “Komunikacijski plan VSTV BiH iz oblasti etike, integriteta i sprečavanja sukoba interesa“. On omogućava izradu specifičnih akcionih planova za realizaciju dobro usmjerenih aktivnosti u oblasti etike, integriteta i sprečavanja sukoba interesa u pravosuđu. Koncentriše se na pitanja etičnosti, integriteta i sprečavanja sukoba interesa u pravosuđu, što je uži oblast, ali ima veliki broj mogućnosti djelovanja i realizacije različitih aktivnosti.

Komunikacijska strategija VSTV-a BiH je, stoga, odličan alat za sve pravosudne institucije da ojačaju komunikacijske aktivnosti i na taj način sami stvaraju svoju sliku u javnosti, osnaže povjerenje građana u institucije i generalno pravosuđe.









Tužiteljica Jasmina Husić, rođena je 1986. godine u Bihaću. Diplomirala je na Pravnom fakultetu Univerziteta u Bihaću 2008. godine. Njen angažman u Kantonalnom tužilaštvu Unsko-sanskog kantona u Bihaću počinje 2014. godine na poslovima stručne saradnice – pomoćnice tužioca. Na poziciju kantonalne tužiteljice imenovana je odlukom VSTV BiH 2021. godine. Trenutno obavlja poslove tužioca u Odjelu za privredni kriminal i korupciju Kantonalnog tužilaštva Unsko-sanskog kantona. Učesnica je Programa individualizirane obuke za tužioce kojeg provodi USAID-ov projekt Pravosuđe protiv korupcije BiH.

## **JASMINA HUSIĆ, TUŽITELJICA KANTONALNOG TUŽILAŠTVA UNSKO-SANSKOG KANTONA:**

**Ne želim da moja, ali i sva naša djeca  
odrastaju u polupraznim gradovima**

**U članu 22. Zakona o VSTV BiH propisano je da su sudije i tužioci osobe koje se odlikuju profesionalnom nepristrasnošću, visokim moralnim kvalitetima i dokazanim stručnim sposobnostima, te da imaju odgovarajuću obuku i stručnu spremu. U kontekstu ovog člana Zakona o VSTV BiH, koji su prema Vašem mišljenju, visoki moralni kvaliteti koje tužilac odnosno sudija mora imati?**

**J. Husić:** Moralne vrline, gdje bih u prvom redu naglasila savjesnost, poštenje, pravičnost i odgovornost, su temeljne vrline koje bi trebale odlikovati svakog nosioca pravosudne funkcije, pa tako i tužioce, naročito jer se kroz posao svakodnevno susrećemo sa brojnim ljudskim sudbinama kroz različite oblike kriminaliteta, a kojima tužilac treba da odgovori zakonito, profesionalno, savjesno, efikasno, vodeći računa o temeljnim ljudskim pravima svih učesnika u jednom krivičnopravnom događaju. Za mene, integritet predstavlja skup svih profesionalnih i moralnih kvaliteta u odnosu na poziciju tužioca, ali i na ponašanje izvan radnog mjesta koje dolikuje toj poziciji.

### **Koji je Vaš motiv da se bavite tužilačkim poslom?**

**J. Husić:** Moj motiv da se bavim poslom ogleda se u želji i nastojanju da pružim svoj doprinos borbi protiv svih oblika kriminaliteta, naročito u borbi protiv korupcije u vremenu kada je korupcija postala razlog sveopće društvene krize, a posebno odlaska mladih ljudi iz Bosne i Hercegovine. Naprosto ne želim da moja, ali i sva naša djeca odrastaju u polupraznim gradovima i da pored naše predivne zemlje bolju budućnost traže negdje daleko od svojih porodica.

### **Kada ste već spomenuli korupciju, možete li nam odgovoriti koji su, po Vašem mišljenju, najveći izazovi u borbi protiv korupcije i organizovanog kriminala, u okolnostima u kojima se trenutno nalazimo?**

**J. Husić:** Korupcija je jedan od najvećih problema našeg društva i mislim da tu rečenicu svi čujemo barem jednom dnevno u javnom prostoru. Možda najveći teret u borbi protiv ove negativne društvene pojave leži upravo na tužilaštvima, koja se u svom radu, konkretno na tim predmetima, susreću sa brojnim poteškoćama kao što su dugotrajna vještačenja, veći standardi dokazivanja koruptivnih u odnosu na ostala krivična djela, opterećenost tužioca pojedinca velikim brojem ovakvih predmeta, kako u fazi istrage tako i na suđenjima, što utiče i na dužinu rada na predmetu, ali i na kvalitet konačne odluke. Jedan od problema dokazivanja koruptivnih krivičnih djela ogleda se i u nepravovremenom prijavljivanju ili neprijavlivanju istih.

### **Šta pod tim podrazumijevate?**

**J. Husić:** Građani bi trebali razumjeti da svoja saznanja u vezi koruptivnih radnji moraju prijaviti nadležnom tužilaštvu ili policijskoj agenciji i da je odgovornost u borbi protiv korupcije, pored institucionalne, također i pojedinačna. Mislim da javnost prije svega nije u dovoljnoj mjeri upućena u nadležnosti tužilaštva, te se iz tog razloga svi događaji sa negativnim odjekom u javnosti „stavljaju na teret tužilaštvu“. Iskreno vjerujem da je najveći broj nosilaca pravosudnih funkcija dovoljno častan, pošten i stručan da radi na koruptivnim predmetima, ali se istima mora omogućiti da svoj posao obavljaju bez pritiska i sa razumijevanjem uvjeta u kojima radimo, a koji su upravo u skladu sa stanjem u državi i društvu.

### **Možete li, iz ugla tužiteljice, s obzirom na to da ste u Kantonalnom tužilaštvu Unsko-sanskog kantona pet godina radili kao stručna saradnica, napraviti komparaciju i istaći koji su to izazovi u radu i šta trebaju znati budući mladi tužioci kada prihvate i preuzmu tužilačku funkciju?**

**J. Husić:** Biti tužilac u današnje vrijeme je izuzetno težak i odgovoran posao. Pored veoma zahtjevnih obaveza tokom redovnog radnog vremena, iziskuje kontinuiran rad na usvajanju novih vještina, znanja, čitanja i analiziranja prakse domaćih i međunarodnih sudova. Moram istaći da određena ograničenja dolaze sa pozicijom nosioca pravosudne funkcije. Tu ne mislim samo na normirana ograničenja, nego i ona koja sami sebi postavljamo u ponašanju na poslu i izvan radnog mjesta. To predstavlja veliki izazov kojem su dužni adekvatno odgovoriti svi oni koji su se opredijelili za ovaj posao.



# VIJESTI IZ PRAVOSUĐA



Obuke za uposlenike u pravosuđu u BiH za oblast etike, integriteta i sprečavanja sukoba interesa

## Integritet uposlenika u pravosuđu neodvojiv od integriteta sudija i tužilaca

U periodu od novembra 2022. godine do maja ove godine, održane su, prvi put za oblast etike, integriteta i sprečavanja sukoba interesa, posebne obuke za uposlenike u pravosuđu BiH. Obuke su uz podršku USAID-ovog projekta Pravosuđe protiv korupcije u BiH, održane za uposlenike partnerskih pravosudnih institucija sa sjedištem u Tuzli, Sarajevu, Zenici, Mostaru i Banja Luci. Obuke su bile bazirane na principima definisanim unutar Modela etičkog kodeksa i smjernica za postupanje uposlenika u pravosudnim institucijama u BiH (Model), koji je izrađen uz podršku Projekta, a kojeg je u martu 2021. godine podržao VSTV BiH.

Model adresira specifične etičke izazove i rizike za uposlenike pravosudnih institucija u BiH i predstavlja osnovu za harmonizovan pristup u uspostavljanju etičkih standarda za uposlenike pravosudnih institucija u BiH. Trenutno ga primjenjuje 25 pravosudnih institucija u BiH.

Ovakve obuke namijenjene uposlenicima u pravosuđu su posebno značajne, jer pored integriteta nosilaca pravosudnih funkcija, jednako važan je i integritet njihovih najbližih saradnika odnosno svih uposlenika u pravosudnoj instituciji. Uposlenici u pravosuđu direktno podržavaju sudije i tužioce u radu i često su prvi koji ostvaruju kontakt sa strankama u postupcima. Zbog pitanja i dilema koje se kontinuirano javljaju u ovoj oblasti, neophodna je i kontinuirana edukacija.

Posljednja obuka za uposlenike u pravosuđu BiH za oblast etike, integriteta i sprečavanja sukoba interesa u ovoj godini održat će se u Bihacu 25. i 26. maja 2023. godine za uposlenike Kantonalnog i Općinskog suda u Bihacu, te Kantonalnog tužilaštva Unsko-sanskog kantona.





## Obuka o komuniciranju u kriznim situacijama u pravosuđu

# Kako pravosuđe u BiH može graditi bolje odnose s medijima

Neophodna je kontinuirana edukacija novinara za izvještavanje o radu pravosuđa, ali i senzibilizacija sudija i tužilaca za odnose s javnošću, posebno onih koji rade na predmetima visoke korupcije, privrednog i organizovanog kriminala, istaknuto je na obuci koja je održana 27.01.2023. godine na Igmanu. Obuka je bila posvećena temi komuniciranja s javnošću u kriznim situacijama i namijenjena sudijama, tužiocima i glasnogovornicima u pravosuđu.

Ovom prilikom je još jednom kao veliki izazov istaknut nedostatak uposlenih profesionalnih glasnogovornika u pravosuđu. To je poseban problem u onim pravosudnim institucijama čiji rad je kontinuirano u fokusu interesa javnosti i medija. Naglašeno je kako je potrebno hitno sistematizirati ovo radno mjesto u cijelom pravosuđu i uposliti profesionalne glasnogovornike u pravosudnim institucijama, s ciljem efikasnije komunikacije s medijima i jačanja njihove transparentnosti u radu.



Pored unapređenja komunikacije i saradnje između pravosuđa i medija, na obuci se razgovaralo i o perspektivi korištenja društvenih mreža u pravosuđu. Ovo je jedna od preporuka Visokog sudskog i tužilačkog vijeća (VSTV) BiH u okviru Komunikacijske strategije VSTV-a. Učesnici su se složili kako komunikacija sudova i tužilaštava prema javnosti putem društvenih mreža ima veliki broj prednosti, kao što su brža i efikasnija razmjena informacija. Međutim, ova vrsta komunikacije zahtijeva značajne kapacitete u smislu vremena i osoblja, što većini pravosudnih institucija u BiH u ovom trenutku nedostaje.

Učesnici obuke su ovom prilikom razgovarali i o određenim latentnim rodnim predrasudama i stereotipima koji postoje u načinu formulisanja poruka koje se emituju prema javnosti. Ovo nije isključivo problem pravosuđa, već društva u cjelini. Učesnici su se složili kako rodno osjetljiv jezik može biti koristan u procesu rušenja rodnih predrasuda i stereotipa, u čemu vodeću ulogu trebaju imati upravo pravosudne institucije. Kreiranjem rodno senzibilnih poruka izbjegavaju se mogući oblici diskriminacije i daje podrška jednakosti žena i muškaraca u društvu.

VSTV BiH je u oktobru 2020. godine usvojilo Strategiju za unapređenje rodne ravnopravnosti u pravosuđu u BiH, s ciljem da se omogući jednak pristup pravdi za sve odnosno jednakost za žene i muškarce pred zakonom.

Obuku je organizirao USAID-ov projekt Pravosuđe protiv korupcije u BiH u saradnji sa Centrom za edukaciju sudija i tužilaca (CEST) Federacije BiH i CEST-om Republike Srpske.



# U tužilaštvima u BiH održane interne edukacije javnog nastupa

Edukacije javnog nastupa za glavne tužioce, tužioce i stručne saradnike održane su u tužilaštvima u BiH u periodu od oktobra do decembra 2022. godine.

Ciljevi edukacije odnosili su se na unapređenje vještina javnog nastupa, te jasnog, transparentnog i sveobuhvatnog komuniciranja sa javnošću, čija je svrha pozitivan utjecaj na percepciju javnosti o tužilačkom sistemu u BiH.

Model internih edukacija razvijen je u okviru projekta „Jačanje uloge glavnog tužioca u javnoj komunikaciji“, koji je uz podršku VSTV BiH implementiralo Udruženje glasnogovornika tužilaštava u BiH.

Edukaciji je prisustvovalo preko 300 tužilaca i stručnih saradnika.



Okružno javno tužilaštvo Doboj, novembar 2022.



Federalno tužilaštvo FBiH, novembar 2022.



Panel diskusija u saradnji sa udruženjima sudija na Igmanu

## Javni istupi sudija i korištenje društvenih mreža

Članovi Udruženja sudija Bosne i Hercegovine, Federacije BiH i Republike Srpske uz podršku USAID-ovog projekta Pravosuđe protiv korupcije u BiH, 30. marta 2023. godine, održali su panel diskusiju na temu: „Javni istupi sudija i korištenje društvenih mreža“.

Tom prilikom istaknut je značaj kontinuirane obuke sudija u oblasti odnosa s javnošću, kako bi se pravosudne institucije mogle predstavljati na adekvatan način. Učesnici su naglasili da zajednička edukacija treba obuhvatiti ne samo predstavnike pravosudnih institucija, nego i novinare koji se bave izvještavanjem o temama iz pravosuđa.

Pored javnih istupa sudija, na panel diskusiji učesnici su razgovarali i o korištenju društvenih mreža nosilaca pravosudne funkcije. Istaknuto je da sudije uvijek trebaju imati na umu da su oni percipirani u društvu kao čuvari vladavine prava i pravde. Stoga, njihov javni istup ni na koji način ne bi smio dovesti u pitanje autoritet, nezavisnost i nepristrasnost. Posebnu pažnju, prema riječima učesnika panela, treba posvetiti postavkama sigurnosti i privatnosti na internetu, te upoznavanjem s načinom njihovog funkcionisanja i korištenja.

USAID-ov projekt Pravosuđe protiv korupcije BiH je u prethodnoj godini izradio analizu „Javni istupi nosilaca pravosudne funkcije i korištenje društvenih mreža“ na osnovu koje je VSTV BiH izradilo Smjernice u ovoj oblasti.



Dan otvorenih vrata pravosudnih institucija u Mostaru

## USAID-ov projekt približava pitanja etike, integriteta i sprečavanja sukoba interesa u pravosuđu budućim mladim pravnicima

Općinski sud u Mostaru, Kantonalni sud u Mostaru, kao i Kantonalno tužilaštvo Hercegovačko-neretvanskog kantona organizirali su 10. maja 2023. godine u Mostaru Dan otvorenih vrata za studente pravnih fakulteta u ovom gradu, kako bi približili važna pitanja etike, integriteta i sprečavanja sukoba interesa u pravosuđu budućim mladim pravnicima, te predstavili načine primjene ovih principa u svojim institucijama. Organizaciju ovog događaja podržao je USAID-ov projekt Pravosuđe protiv korupcije u Bosni i Hercegovini (BiH) u saradnji sa Visokim sudskim i tužilačkim vijećem (VSTV) BiH.



Ana Šego, studentica Pravnog fakulteta Sveučilišta u Mostaru

„Kao budući nositelji pravosudnih funkcija, naš zadatak bit će izgradnja bolje i sigurnije budućnosti za sve naše građane i građanke, osiguravajući im zaštitu prava i interesa kroz pravično i efikasno suđenje. Da bismo to mogli raditi, neophodno je da smo upoznati sa svim važnim pitanjima u oblasti etike u pravosuđu i njihovom primjenom u praksi, što je u fokusu današnjeg događaja“, rekla je Ana Šego, studentica Pravnog fakulteta Sveučilišta u Mostaru nakon događaja.

Njena kolegica Lamija Karadža, studentica Pravnog fakulteta Univerziteta „Džemal Bijedić“ u Mostaru istaknula je kako nesumnjivo postoji veliko nepovjerenje prema pravosudnim institucijama u BiH. **“Upravo zato, drago mi je da su se pravosudne institucije u Mostaru počele otvarati na ovaj način i to baš prema nama, studentima. Neizmjereno sam zahvalna što sam danas dio ove pozitivne priče, jer je ovo posebna prilika za učenje, rast i razvoj budućeg mladog pravnika“**, rekla je Lamija Karadža.



Lamija Karadža, studentica Pravnog fakulteta Univerziteta „Džemal Bijedić“

Misija USAID-a u BiH kroz brojne projekte i aktivnosti promoviše principe etike, odgovornosti i integriteta u obavljanju javnih funkcija, posebno u oblasti pravosuđa, i pruža podršku VSTV-u BiH u razvijanju instrumenta za njihovu primjenu. Upoznavanje studenata pravnih fakulteta sa ovim principima i instrumentima za njihovo provođenje podržat će rano opredjeljenje budućih sudija i tužilaca da doprinesu izgradnji nezavisnog, nepristrasnog i efikasnog pravosuđa.

USAID-ov projekt Pravosuđe protiv korupcije u BiH podržava partnerske sudove i tužilaštva u jačanju kapaciteta za efikasan rad na predmetima korupcije i organizovanog kriminala visokog nivoa, kao i u jačanju integriteta i transparentnosti u pravosuđu. Općinski sud u Mostaru, Kantonalni sud u Mostaru, kao i Kantonalno tužilaštvo Hercegovačko-neretvanskog kantona partneri su USAID-ovog projekta od oktobra 2019. godine.



